



Pagina 3

Tjon: Ta respeta decision
pero no motibo



Pagina 2

Segun lider di fraccion di MEP, Rocco Tjon

'Ta respeta decision di Parlamentario Lejuez, pero ta contra di motibonan'



ORANJESTAD – Como lider di fraccion di MEP, Parlamentario Rocco Tjon, no ta reconoce nan mes den e potencianan cu nan ex colega di fraccion, Daphne Lejuez, a trece

dilanti como argumento pa bira parlamentario independiente.

Te hasta el a bisa cu nan ta lamenta como fraccion y partido cierto expresion cu

Lejuez a haci durante su conferencia di prensa haci na BAZ-RRR Galeria & Braserie. Nan ta rechasa esaki no solamente como fraccion, sino como partido tambe.

“Nos por conclui awe cu interres personal a vence interres general y bienestar di pais Aruba”, asina lider di fraccion di MEP a bisa.

Tjon a refuta locual Parlamentario Lejuez a indica, cu parlamentarionan ta wordo silencia, intimidada of presiona pa tuma cualkier decision. El a bisa cu esaki no ta cuadra den e filosofia di un partido social-democrata cu ta e signatura di partido MEP. El a agrega cu nan posicion independiente ta wordo expresa por ehempel ora cu e ley di supervision financiero CAft a wordo trata, caminda fraccion di MEP a presenta cambio of amienda riba e ley aki presenta pa gobierno. El a menciona e ehempel aki pa refuta e ponencia di Lejuez, cu e miembronan di e fraccion aki ta wordo silencia, intimidada of presiona pa bay un

cierto direccion.

Segun Tjon, den nan partido ta biba democracia. P'esey nan a respeta e decision tambe di nan colega di fraccion, Lejuez. Sinembargo el a expresa cu aunke nan ta respeta su decision, nan no ta di acuerdo cu su motibonan pa bira independiente.

Tjon a bisa cu como lider di fraccion, dos siman pasa el a hiba un combersacion cu Lejuez na momento cu el a splica su puntonan di preocupacion riba e ley di Serlimar riba Facebook. El a tilda esaki como un combersacion 'sumamente positivo.' Un combersacion cu e no a sinti niun indicacion di Lejuez cu e no ta sinti su mes bon mas den e partido MEP y tampoco den nan fraccion. Al contrario, te hasta Lejuez a bis'e cu lo bay lag'e sa como lider di fraccion, cual ta e ultimo tres puntonan di preocupacion riba e ley di Serlimar.

E ta kere cu e motibo real di e decision di Lejuez tin di haci cu diabierna ultimo den Par-

lamento, den un reunion di Comision Central, un decision a wordo tuma contra e Parlamentario di AVP relaciona cu e caso Avestruz. Eynan el a expresa cu ta diferencia di opinion di e fraccion di MEP. Ya cu e si ta haya bon cu e ex minister y parlamentario por representa pais Aruba den Parlatino. E mesun dia ey, Lejuez a sali for di e chat group cu nan tin pa comunicacion cu otro tambe, Tjon a bisa.

Tjon como lider di fraccion aki ta lamenta e posicion aki, pero mas ta lamenta cu Lejuez ta pretende di ta para pa politica nobo y transparente. Pero tambe nan a lamenta cu en bes di cumpli loke el a priminti di informa nan riba cualkier decision cu e lo tuma, el a dicidi di bay den media di comunicacion pa nan por a tuma nota di su decision.

“Mi ta kere cu sigur esaki no por ta parti di un politica nobo, un politica transparente, profesional, y honestidad cu mester para p'e”, e lider di fraccion di MEP a bisa.

Coalicion ta comenta riba retiro di Lejuez

ORANJESTAD – Ayera den oranan di anochi, gobierno di coalicion MEP-POR-RED a duna un mensahe tocante e retiro di Parlamentario di MEP, Daphne Lejuez.

E comentario di e coalicion ta lo siguiente:

“Awe Sra. Daphne Lejuez a entrega su retiro como Parlamentario di MEP.

Esaki ta algo cu partido MEP lo atende internamente prome. Pa Gobierno nada ta cambia. E acuerdo di Coalicion entre partidonan MEP-POR-RED ta sigui manera acorda den e programa di gobernacion “Hunto Pa Aruba” y lo sigui atende cu e retonan real di nos pais, pa asina brinda Aruba e estabilidad politico cu nos mester na e momento aki.”

Parlamentario Daphne Lejuez:

Mi a dicidi di bira parlamentario independiente

ORANJESTAD – Parlamento Daphne Lejuez ta bandona fraccion di MEP y ta declara Parlamentario independiente pa representa pueblo di Aruba. El a comparti e motibo pa yega na tuma e decision.

Lejuez a lesa su declaracion caminda e ta cuminsa splica cu su intencion pa uni den politica cu meta pa tene hende central segun constitucion cu a bringa p'e. Su carera den politica ta pa salvaguarda constitucion, hende y bienestar di Aruba como candidato di lista MEP y parlamentario di pais.

El a bisa cu semper a para pa local ta husto y correcto 'intencion ta pa sigui hac esey' sea pa su mes, famia y pais. El a huramenta dilanti gobernador y pa haci su trabou cu consenshi limpi cu honor y sin presion 'pa interes general di Aruba'.

Den su declaracion e ta continua cu una bes el a huramenta, e ta eherce privilegio di presenta henter pueblo pa controla gobierno y legislado. "Un tarea cu ta sigui segun articulo 1 di constitucion sin destingui raza, poder economico, color, creencia, preferencia politico, sexualidad of genero.

Su experiencia como parlamentario ta pa su lealtad

mester ta na prome luga pa pueblo y no interes partidista 'manera legislado pa amplia conocimiento y particularmente huridico'. Pa e reto ey Lejuez a cuminsa cu facultad di ley na universidad di Aruba pa asina amplia riba e conocimiento pa evalua y contribui miho na e ley.

Segun Lejuez, di e forma ey pa percura pa e ley ta bon hinca den otro y pa tur cumpli cu requisito legal di transparencia y bon gobernacion pa beneficio di pueblo.

El a expresa cu tabata un decision dificil pero circunstancia na caminda a cambia. Lejuez tambe a comparti e ley tocante e situacion financiero cu gobierno a enfrenta cune. Su persona lo sigui cu trabou den Parlamento pero independiente 'mi no lo ta oposicion'. Brinda libertad pa contribui na un forma mas balansa, obhetivo y husto na 'interes di nos pais'.

"Un trabou di parlamento no ta obstante di 100, 196, 2300 y 7822 voto pero interes general prome cu su partido of den coalicion. E lo sigui den bon gobernacion y transparencia. Parti cu mi a uni na señora Evelyn y partido MEP como fundeshi pa e cambio necesario pa futuro prospero y sostenibel.

Como parlamentario independiente, e lo sigui adopta



e vision di tene central y tene local e tin cu cumpli pa huramente pa pidi tene legislado y controlando gobierno como bos di pueblo y defende constitucion pa bienestar general y para pa derecho di ciudadano.

A puntra Lejuez si desicion ta pa local e comentario cu su casa tin contract cu Meta Corp, y el contesta cu tin un parti, pero mas tanto ta pa detecta e fayó di ley fundamental y no mester wordo intimidada y persegui. Cu apenas 2 aña den politica, e lo keda

activo pa para pa local ta correcto y haci e trabou debidamente. Te ainda no ta bisa cu ta uni na otro partido. El a tene palabracion cu Minister President y cu fraccion.

Tambe miembro di prensa a puntra Lejuez dicon e no ta bandona su asiento como Parlamentario. El a contesta cu esey lo a bira e decision mas facil pa entrega, pero esun dificil ta pa keda independiente y sigui bringa pa pais 'pa haci lo correcto te ora mi por'.

"Nan lo critica e persona semper, si bo no para na dado momento ken ta bay para pa haci e diferencia. Pero si haci diferencia nan ta bay critica tambe. Den pasado por a wak parlamentario cu a para pa local nan a kere den nan pais", el a expresa.

Sinembargo Lejuez a bisa cu comentario cu lo lanta su mesun partido y lo uni cu otro partido, e ta bisa cu no ta correcto. "No ta prioridad kico lo bin next. No ta mi enfoko, pero pa sigui haci mi trabou manera debe ser."

Ley di Serlimar conflicto clave den salida di Lejuez

ORANJESTAD – Durante e rueda di prensa cu parlamentario Daphne Lejuez a duna ayera pa splica su salida di fraccion y partido MEP, a sali na cla cu e diferencianan di opinion tocante e cambio di ley di Serlimar a hunga un papel clave. Aki seguidamente e parti di su discurso riba e tema ey.

"Recientemente den tratamiento di ley di Serlimar, mi persona, conhuntamente cu conseho huridico di instancianan manera Raad van Advies y di otro expertonan tanto huridico como constitucional, a detecta inconsistencianan den e estructura legal di e ley unda cu esaki lo por hiba na consecuenecianan cu lo por mina derechonan di ciudadano unda cu segun interpretacion di

e ley, lo otorga un compania estatal e poder di cobra pa un 'afvalstoffenheffing', es decir, belasting riba desperdicio, sin fundamento legal of declaracion di destinacion conciso con e fondonan aki lo wordo utiliza. Adicionalmente e ley tambe lo otorga e minister en cuestion e autoridad absoluto pa cambia e tarifa di e afvalstoffenheffing aki sin intervencion di gobierno of Parlamento. E falta di transparencia aki ta un punto di preocupacion grave, cual mester keda adresa, y na unda a purba di silencia y intimidacion mi cu e fin di sostene y proteha e coalicion actual. A sabienas cu e formulacion di e concepto di ley aki tambe lo mina e derechonan di e ciudadano pa por haci bezwaar/entrega reclamo ora di tin un obhecion contra un posibel cobranza. Esaki lo no ta husto

pa e ciudadano. Na Departamento di Impuesto, por ehempel, esaki ya conoce un procedura estableci y cu conoce su proceso legal sin costo adicional pa e ciudadano.

E ta un deseo di nos tur, pa hopi aña, pa Parkietenbos wordo cera y soluciona, pa por proteha salud y bienestar di esnan cu ta biba y traha den bisindario, y tambe pa proteha nos medio ambiente. Esaki no ta un reto cu por wordo soluciona solamente dor di un bes mas hinca man den cartera di e ciudadano sin mas, mirando cu tin hopi mas factor importante cu mester considera y cu no ta forma parti di e ley aki. Es mas, e contenido di e ley aki, den mi opinion, ningun caminda ta garantisa cu lo cera Parkietenbos.

Mientras e ley ta existi un aumento di entrada pa maneho di Serlimar, te dia di awe no a logra di substancia esaki door di produci un Business Plan, ni tampoco un plan operacional of di contingencia den caso di incidente ambiental. Mucho menos un plan financiero cu ta defini e pafico di un aumento di tarifa y introduccion di un afvalstoffenheffing (impuesto), sin presenta un especificacion di e gastonan adicional. No por impone un afvalstoffenheffing sin tin un afvalstoffenverordening existente, den otro palabra, pa ley bo no por cobra un impuesto sin cu tin un ley cu ta stipula esaki, dus sin un afvalstoffenverordening no por tin un afvalstoffenheffing, y esaki ta un di mi preocupacionan mas grandi cu e ley di Serlimar. Nos no por dreña den cartera di Pueblo

sin mas.

Atraves di belasting di Pueblo, Land Aruba ya ta injecta 22 milyon florin anualmente. Ta importante pa Serlimar tin su derecho di existencia, pero cobra pa un servicio ta un cos, pero impone un impuesto sin substancia financiero of legal ta un otro cos. E falta di transparencia di maneho aki no ta husto ni pa e empleadonan di Serlimar, ni pa e clientenan di Serlimar, ni tampoco pa tur e ciudadano, comerciante y turistanan riba ken kier impone e afvalstoffenheffing (impuesto) aki.

E version completo di e discurso ta disponible riba nos pagina di Facebook.